

TUI CHI SCIS...

Tui chi scis it'est
su sabòri ferosu de su mundu
e bufas in is arrastus de arrius,
de mitzas arestis siccadas de soli,
o in sa proidura pudescia e umbrosa
de is fossus lassaus 'e is mortaius...

Tui chi scis danzai
a sonu de tamburu tott'is ballus
a peis insanguentaus e pren' 'e musca,
ispollincu e pringiu de su 'entu
chi messat pebeddosas pestas,
ingranias incungias po brentuxus...

Tui chi scis cunfundi
sa nexi bianca cun s'arrosu,
e arris tzicchirriendi arena
in is dentis dicadas de su famini,
e non connoscis civraxudas mesas
si no is de su priogu appariciadas...

Tui chi scis prangi
is lagrimas prus mudas
cun su pruini de is domus isciusciadas,
sen' 'e circai sali po is liàgas...

Tui chi scis pregai
pibionosus arrosarius 'e badas
a unu Deus sen' 'e murrungius,
cun manus iscrelitas
ch'istringint nieddas
carvarius de passioneras gruxis...

Tui chi scis cantai
is prus disisperaus trumentus
cun ghitarras de isperas,
sen' 'e connosci is nodas o su tempus
chi passat aurtizzu is istàsonis...

Tui chi scis perdonai
cun ogus de orfanas nottis,
is isteddus chi si fuint in atrus celus...

Tui chi scis cumprendi
ca de su propriu ludu ses fattu,
uguali a is atrus fillus 'e su mari
innui lièru si ddui depiat tuffai
unu celu illacanau de coloris.

TU CHE SAI...

Tu che sai cos'è / il sapore dell'odio nel mondo / e bevi sull'orma dei fiumi, / di fonti ribelli essiccate dal sole, / o dalla pioggia putrida d'orrori / rimasta nei crateri dei mortai...

Tu che sai danzare / tutti i balli al rullo dei tamburi / coi piedi piagati e invaso di mosche, / nudo e incinto di vento / che miete appestate vittime, / raccolti copiosi per avvoltoi...

Tu che sai confondere / le colpe col bianco riso, / e ridi ruminando la sabbia / coi denti cariati di fame, / e non conosci le grandi abbuffate / se non i banchetti di pidocchi...

Tu che sai piangere / le più silenziose lacrime / con la polvere delle case crollate, / senza cercare il sale per le ferite...

Tu che sai pregare / con bacche inermi di rosari / ad un Dio senza lamenti, / con mani deformi / che stringono nere / passioni di calvari e di croci...

Tu che sai cantare / i più disperati tormenti / con chitarre di speranze, / senza conoscere le note od il tempo / fertile delle stagioni che passano.

Tu che sai perdonare / con gli occhi orfani delle notti, / le stelle che fuggono in altri cieli.

Tu che sai comprendere / che sei fatto dello stesso fango, / uguale agli altri figli del mare / ove libero dovrebbe tuffarsi / un cielo infinito di colori.